

qui depuis [14] la creation du monde y auoient esté deniez à celuy qui feul les meritoit. Nombre d'Algonquins ayant hyuerné cet hyuer prés de nous, c'estoit vn doux motet d'entendre en mesme temps les loüanges de Dieu en trois & quatre langues; en vn mot, ie puis dire que cette maison est la maison de paix, iusques là mesme que les Sauuages qui ailleurs nous font plus ennemis & les plus infolens contre nous, prennent ce semble des sentimens & vne humeur toute contraire, lors que nous les voyons chez nous. Nous espérons qu'avec le temps les choses s'adouciront de plus en plus, & qu'en fin on les verra reduits en leur deuoir.

L'ordre que Monsieur le Cheualier de Montmagny nostre Gouverneur, apporta l'an passé au temps qu'ils estoient descendus en traité pour punir & reprimer les insolences qu'icy haut ils auoient commis contre nous, a eu desia de bons effects dans l'esprit de ces Barbares, qui apres leur retour n'ont pas moins admiré la sagesse de sa conduite & de sa iustice sur le passé, qu'ils ont [15] redouté ces menaces pour l'aduenir. Iusques là mesme que quelques nations entieres nous ont icy rendu iustice du tort que nous auions receu de quelques vns d'entr'eux pour euitter la punition & le reproche qu'ils craignoient de recevoir là bas aux trois Riuieres. C'est sagement se feruir de son autorité, de reduire sous les loix de la iustice vn peuple barbare, esloigné de trois cens lieuës de vous; & c'est employer sainctement son pouuoir, de le rendre efficace pour maintenir en paix les Predicateurs de la Foy, dans vn país où l'impieté & l'insolence ont regné depuis le commencement du monde. Vn tel appuy de l'Euangile ne seruira pas